

上饒縣志 卷十

人物

先正 學業 宦蹟 孝友 忠節  
隱逸 義行 方技 寓賢



人才之興非獨地氣隆也蓋亦有師友之助焉子觀

唐書惟載貴溪吳武陵而上饒王貞白亦唐時人為

邑人物鼻祖武陵磊砢多奇節而貞白夷猶澹遠不

求聞達孔子謂不得中行而與之必也狂狷其不在

斯人也與有宋陸文安公講學象山而朱文公由徽

抵建安往來取道上饒邑人士問業者舉考朱子紹

興十八年進士余堯弼以殿中侍御史為考官經義

考載余大雅陳文蔚爲朱子傳詩門人朱子註儀禮  
諸書又以文蔚相去遠不獲助我爲憾則其學業之  
深醇可知矣夫六經爲聖賢之心經解謂詩之爲教  
溫柔敦厚禮之爲教恭儉莊敬前之君子師大賢而  
傳其教故後之君子私淑討論亦多冲和之氣謹恪  
之風與貴溪人士氣象或殊焉謂非詩禮之澤不得  
也然則士人有志追古人而從之遊其可不務通經  
也哉

先正

唐

王貞白字有道靈溪人乾寧二年進士授校書郎先是崔  
凝典文衡不協士論上詔陸辰覆試武德殿貞白占優等  
授書郎遭時不偶隱居教授以道學自任四方學者宗  
之有靈溪集行世

舊志

按信乘續封貞白上饒人今祠永豐以墓在豐故耳  
集各靈溪靈溪在上饒二十里且豐自乾元間據  
饒爲縣元和復省人上饒則爲上饒可知作永豐人

誤跋

今按容齋隨筆亦載貞白永豐人然唐末無此縣名  
 自當從文獻通考作上饒人乾寧二年進士授校書  
 郎林志西江詩話俱作秘書郎疑誤舊志謂遭時不  
 偶隱居教授本於林志所謂以道學自任者疑無所  
 據然考姓源珠璣云貞白性恬順明易象昭宗狩於  
 岐退居著述遂不復仕則亦未為言大而夸也明李  
 奎作貞白墓表謂郡守姚堂以貞白為信郡人物之  
 祖是未考吳武陵唐書本傳矣又謂貞白不僅以詩  
 為世所崇重誠然盛推其詩以為聯芳李杜並駕

韋柳稍失實矣故墓表不錄

宋

余堯弼字致勳政和進士授祁門令務以德化人民服其  
 德量指邑之祁山曰雖昇是寘公腹中不礙也累官簽書  
 樞密院叅知政事嘗使金專對有體金主憚之未幾乞解  
 機務翛然林下與漁樵伍忘其貴且齒云通志

按堯弼家乘載勅建屋在城西今子孫居南鄉上瀘  
 由宋迄今衣冠不替實信之望族云原跋

施師點字聖與十歲通六經十二能文弱冠遊太學試每

在前列司業高宏稱其文深醇有古風尋授以學職以舍  
選奉廷對調復州教授未上下內艱服除爲臨安府教授  
乾道元年陳康伯薦賜對言歷年屢下詔恤民而惠未加  
浹陛下軫念惟恐一夫失所郡邑搜求惟恐射賦不柔毋  
惑乎日降絲綸恩不沾被細民旣困於倍輸又困於非法  
重以歲惡室且垂罄租不如期積多逋負今明堂肆赦戶  
自四等以下逋自四年以前願悉除免上曰非卿不聞此  
言詔從之八年兼權禮部侍郎除給事中時太子詹事已  
陞工少特令增員爲二命兼之賜對言比年人物凋盡上

氣耗薊當廣儲人材以待用上曰觀卿所奏公輔器也  
翰林學士知制誥兼侍讀使金致命金廷立班旣定相儀  
者以親王將至命師黜退位師黜跪立相儀者請數四師  
黜正色曰班立已定尙欲何爲不肯少動在廷相顧駭愕  
知其有守不敢復以爲請九年使還言其事於上者上  
嘉歎不已及後金使賀正且至關關館伴師黜今居何官  
館伴宇文介於班列中指師黜以示之金使恍然曰一見  
正人令人眼明十年除端明殿學士簽書樞密院事入奏  
控免上曰卿靖重有守識慮深遠朕欲用卿久矣復詔兼

參知政事除參知政事兼同知樞密院事師黜嘗同宰相  
奏事退復同樞密周必大進呈上曰適一二事卿等各陳  
所見甚關大體前此宰相奏事執政不措辭今卿等如此  
深副所望必大奏祖宗時宰執奏事自相可否或至面相  
切責退不相啣自秦檜用事執政畏避不敢言陛下虛心  
兼聽若只宰相奏事何用執政爲師黜復奏臣敢不竭股  
肱之力上因諭之曰朕欲天下事日往來胸中未嘗釋也  
先是州郡上供或不以時進立歲終稽考法及是主計臣  
有喜爲督促者乞不待歲終先期行之畫命已下師黜髮

然曰此策若行上下逼迫民不聊生或謂令已出矣師  
曰事有爲天下病惟恨更之不速卽追寢其議樞密周必  
大舉手賀師黜曰使天下赤子不被其毒者公之賜也一  
日入對後殿上曰朕前飲冰水過多怒暴下幸卽平復師  
黜曰自古人君當無事時快意所爲忽其所當戒其後未  
有不悔者上深然之十三年辭兼同知樞密院事權提舉  
國史院權提舉國朝會要十四年除知樞密院事師黜倦  
倦搜訪人才手書置夾袋中謂蜀去朝廷遠人才難以自  
見蜀士之賢者俾各疏其所知差次其才行文學每有除

授必列陳之五年春以資政殿大學士知泉州除提舉臨安府洞霄宮紹興二年除知隆興府江西安撫使師黠嘗謂諸子曰吾平生仕宦皆任其升沉初未嘗容心其間不枉道附麗獨人主知之遂至顯用夫人窮達有命不在巧圖惟忠孝乃吾事也三年得疾薨年六十九贈金紫光祿大夫

宋史

王時敏字德修屏門里人學有源流兼該體用嘗從呂東萊遊與朱子友善卒葬本鄉湖潭朱子哭以詩曰不到湖潭二十年湖潭依舊故山川聊將杯酒奠青草風雨蕭蕭

憶昔賢通志

余大雅字正叔德性和粹器量宏遠聞晦翁講學閩中毅然往師之晦翁嘉其勤平居問答僅存語錄刻於江東庾

臺通志

按先生世居上瀘其後裔猶嘉至今能守其訓讀其書凡雲巖故址經理如新猶可想見其遺風焉

陳文蔚撰墓碣曰銀山傅商弼一曰來訪文蔚蹙然而言曰正叔余先生子師也歿幾三十年嗣人淫微不能發其先德使有善弗彰吾子合為論著予將以碣諸石使來者有考焉文蔚聞其言而悲曰正叔子同門友也知其生平甚悉文蔚雖不文其敢辭正叔諱大雅余其姓也世居上瀘曾祖大約祖安節父思

人物 先正

永皆應舉為儒而未有顯者正叔自肆舉子業已見  
 許於鄉之儒先未幾預薦送然志不在是聞聯翁朱  
 先生講學闕中毅然登門窮鄉晚出科舉外未省他  
 有所謂學正叔獨倡而先之豈孟子所謂豪傑之士  
 也與弟大猷從其所師相繼而往交蔚亦因正叔拜  
 先生於紫陽書堂正叔志道懇惻問難叩擊齷齪不  
 倦按諸心一毫有未得雖往返十數不置期於釋然  
 而後已先生嘉其勤竭兩端以告嘗因書論儼義工  
 夫先生指示日用之親切者謂是斯警策通貫動靜  
 正叔得其語表裏用工非惟自勉不暇見同志亦以  
 相勵常恐此心外用日誦中庸不願乎外之言以自  
 寬可知為學之本務也先生嘗從容與之語而喜曰  
 且為君立得一基址今當奮着力處正叔將以是而  
 終身焉不幸天嘗之矣嗚呼正叔而止此夫正叔力  
 於為善初罹外難以禮自繩不御酒肉後歲登師門  
 度閩嶺或犯霜露冒炎暑不以為憚稟氣既薄且多  
 病竟以不壽亡西秋九月予往省先生值正叔將歸  
 語別武夷溪上未兩月而訃聞矣實十一月乙丑也

平日與先生問答書非一厄  
 於煨燼無存者人皆惜之

陳文蔚字才卿朱子門人著書立說深得旨趣朱子與手

書往復互相論正所作州學修禮器記亦惟尊朱子儀式

而損益焉通志

附張時雨紀述一則先生因同鄉余正叔得師朱子  
 其學以求誠為本以躬行實踐為從事先加意於學  
 問思辨所友若徐子顏即朱子所云一室蕭然有以  
 自樂令人敬歎者吾知徐子融志氣剛決勇於求道  
 其切磋尤詳他如吳伯豐李敬子諸君子一時倡和  
 豫章之學為不孤云隱居邱園屢聘不起聚徒講學  
 以斯文自任鄉邦尊仰之居恒雅慕邵康節先生性  
 情吟咏每與相近宜其芥視名位而不顧也所最盡  
 心者莫如養志而尊人竹林翁壽九十四而終人以  
 為孝行所感召子若孫能世其學尤為孝義之族賢

人物 先正

者有後竟不誣矣其見許於朱子者詳性理大全朱子大全故不贅如門人徐元杰每嘗往來問答書啟蠹蝕難以刻紀姑掇拾所見聞於此

徐元杰字伯仁幼穎悟誦書日數千言每冥思精索開陳文蔚講書鉛山實朱熹門人往師之後師事真德秀紹定五年進士及第簽書鎮東軍節度判官廳公事嘉熙二年召爲秘書省正字遷校書郎奏否秦剽復之理因及右轄久虛非骨鯁者艾身足負荷斯世者不可輕畀又言皇子竑當置後及蚤立太子乞蚤定大計時諫官蔣峴方力排竑置後之說遂力請外不許卽謁告歸丐祠章十二上三

年遷著作佐郎兼兵部郎官以疾辭差知安吉州辭召赴行在奏事辭益堅淳祐元年差知南劍州會峽陽寇作擒渠魁八人斬之餘釋不問父老或相語曰侯不來我輩魚肉矣郡有延平書院率郡博士會諸生親爲講說民訟率呼至以理化誨多感悅而去輸苗聽其自槩闔郡德之丁母憂去官衆遮道跪留旣免喪授左司郎官敵國外患乞以宗社爲心言錢塘駐蹕騎奢莫尙宜抑文尙質兼崇政殿說書每入講必先期齋戒嘗進仁宗詔內降指揮許執奏及臺諫察舉故事爲戒語多切宮壺拜將作監進楊雄



大匠箴陳古節儉時天久不雨轉對極論洪範天人感應之理及古今遇災脩省之實辭益忠懇丞相史嵩之丁父憂有詔起復中外莫敢言惟學校士叩關力爭元杰時適輪對言臣前日晉侍經筵親承聖問以大臣史嵩之起復臣言陛下出命太輕人言不可沮抑陛下自盡陛下之禮大臣自盡大臣之禮玉音賜俞臣又何所容喙今觀學校之書使人感歎且大臣讀聖賢之書畏天命畏人言家庭之變哀戚終事禮制有常臣竊料其何至於忽送死之大事輕出以犯清議哉前日听庭出命之易士論所以凜凜

者實以陛下爲四海綱常之主大臣身任道揆扶翊綱常者也自聞大臣有起復之命雖未知其避就若何凡有父母之心者莫不失聲涕零是果何爲而然人心天理誰實無之興言及此非可使聞於鄰國也陛下烏得而不悔悟大臣烏得而不堅忍臣懇懇納忠敢諷特爲陛下愛惜民彝爲陛下愛惜名節而已疏出朝野傳誦帝亦察其忠亮每從容訪天下事經筵益申前議未幾褒降御筆黜四不才臺諫起復之命遂寢元老舊德次第收召元杰亦兼右司郎官拜太常少卿兼給事中國子祭酒權中書舍人杜

範入相復延議軍國事爲書無慮數十所言皆朝廷大政  
邊鄙遠慮每裁書至合隱憂處輒閣筆揮涕書就隨閣  
雖子弟無有知者六月朔輪當侍立以暴疾謁告特拜工  
部侍郎隨乞納祿詔轉一官致仕夜四鼓遂卒先元杰未  
死之一日方謁左丞相范鍾歸又折節察院劉應起將以  
翼日奏事是夕俄熱大作詰朝不能造朝夜煩愈甚指爪  
忽裂以死朝紳及三學諸生往弔相顧駭泣訃至帝震悼  
曰徐元杰前日方侍立不聞有疾何死之遽耶亟遣中使  
問狀賻贈銀絹二百計已而太學諸生伏闕懇其爲中毒

且曰昔小人有傾君子者不過使之自死於蠻煙瘴雨之  
鄉今蠻煙瘴雨不在嶺海而在朝廷望奮發睿斷大明典  
刑於是三學諸生相繼叩闕訟寃臺諫交疏論奏監官亦  
合辭聞於朝二子直諫直方乞以恤典充賞格有旨付臨  
安府逮醫者孫志寧及常所給使鞠治旣又故理寺詔殿  
中御史鄭案董之且募告者賞緡錢十萬官初品大理寺  
正黃濤謂伏暑證二子乞斬濤謝先臣然獄迄無成海內  
人士傷之帝悼不已賜官田五百畝緡錢五千給其家賜

謚忠愍

宋史

附宋史程公許一則程公許亟奏曰正月侍御史劉  
漢弼死四月右丞相杜範死六月右史徐元杰死漢  
弼之死固可疑範之死人言已藉藉然漢弼類風淫  
未疾範亦疴弱多病諺曰天命猶可也元杰氣體魁  
碩神采嚴毅議論英發甫聞謁告奄至暴亡口鼻四  
齧變異之狀使人爲之雪涕不已六館諸生叩關籲  
告陛下始命有司置獄鞫勸謂當於朝紳中選公正  
明決無所顧忌者專蒞其事盡情研究務使得實集  
議朝堂分列首從必誅無赦疏入不報物論沸騰臨  
安尹趙與憲奏乞置獄天府帝從之公許繳奏與憲  
乃嵩之死黨乞改送大理寺命臺臣董之詔殿中侍  
御史鄭案案回懦首鼠事竟不白然公論莫不偉公  
許

元

陳苑字立大資稟穎異深信陸子之書絕意仕進時許文

正諸公方崇朱子之學既設科取士非朱氏之說者不用  
苑守所學不變閉戶潛脩躬行實踐德益充望益重於是  
有志之士爭來問學弟子李存祝蕃舒衍吳謙最著苑以  
靜明名其書齋學者稱靜明先生其沒也蕃狀其行甚詳  
今蕃集不傳惟存所爲墓誌銘見俟菴集中

按府志載費溪人今按李存所爲墓誌銘乃云上饒  
人至順庚午卒明年殯於邑東郭墓於瑜山皆上饒  
地故補入李存墓誌  
銘見俟菴集原跋

明

陳脩字伯昂從太祖平浙東授理官援引律令悉本寬厚

盡改元季弊政擢兵部郎中遷濟南知府時亂後比戶彫  
殘且多衛將練兵屯田其間脩撫治有方兵民相安流亡  
復業帝嘉之洪武四年拜吏部尚書六部之設始自洪武  
元年鎮江滕毅首長吏部佐省臺裁定銓除考課諸法畧  
具至是脩與侍郎李仁詳考舊典參以時宜按地衝僻爲  
設官煩簡凡庶司黜陟及課功覈實之法皆精心籌畫銓  
法秩然未幾卒官

明史

按林志人物志皆以脩爲弋陽人

通志原跋

婁諒字克貞少有志絕學聞吳與弼在臨川往從之一日

與弼治地召諒往視云學者須親細務諒素豪蕩田地播  
節雖掃除之事必身親之景泰四年舉於鄉天順末選爲  
成都訓導尋告歸閉門著書成日錄四十卷三禮訂訛四  
十卷謂周禮皆天子之禮爲國禮儀禮皆公卿大夫士庶  
人之禮爲家禮以禮記爲二經之傳分附各篇如冠禮附  
冠儀之類不可附各篇者各附一經之後不可附一經者  
總附二經之後其爲諸儒附會者以程子論黜之著春秋  
本意十二篇不採三傳事實言是非必待三傳而後明是  
春秋爲棄書矣其學以收放心爲居敬之門以何思何慮

勿忘勿助爲居敬要旨然其時胡居仁頗譏其近陸子後  
羅欽順亦謂其近似禪學云子忱字誠善傳父學女爲寧  
王宸濠妃有賢聲嘗勸王母反王不聽卒反諒子姓皆捕  
繫遺文遂散軼矣

明史

王讓字謙光由進士授給事中屢觸忌諱不以禍怵一時  
權貴深憚之里人相軋者因希風旨嗾言官誣劾出補濟  
南通判再擢楚雄知府大憚黔國公以下重其素望咸咨  
以邊務焉平生章疏最多燬不存方擬大用以入覲適家

而卒

通志

婁謙字克讓成化進士任御史嘗督南畿陝西學政以躬  
行實踐爲教士類風動時汪直新貴能禍福人謙絕不與

接銜之使邏校伺察竟莫間陞四川左布政使卒

通志

婁忱字誠善幼有奇質落筆驚人不苟時好連不得志晚  
以歲貢授歸安訓導尋棄官歸憂其兄之所爲托疾不下  
樓者十年戶部侍郎邵公二泉呼爲樓上先生其兄死乃  
下樓國母之喪例受衰服忱獨力陳古義幾爲宸濠捶死  
賴都憲王陽明救解得免卒以妃族被逮死獄非其罪也

門人夏尚朴爲銘誌

舊志

葉鏗字汝聲號少巖廣南守鶴子也嘉靖進士選庶吉士  
補兵科給事中彈劾不避權貴以言事稱旨命總理六科  
事時嚴嵩當國鄢懋卿以假子得幸奉勅督理八省鹽課  
信食浙鹽故無饜使巡歷懋卿嗾御史宿應參疏請得按  
信如浙直例鏗手疏糾之上嘉納爲寢前詔他如陳國是  
六事罷遣脩邊大臣糾司計大臣不職裁革閩浙添設巡  
撫以省隔屬供億及嚴會計停加賦處運糧議漕儲纏纏  
萬言皆時政之大者上悉報可累擢京兆尹南大理卿少  
司寇晉秩尙書致仕歸卒於家

舊志

楊時喬字宜遷號邱菴嘉靖四十四年進士除工部  
權稅杭州令商人自署所入輸之有司無所預隆慶  
冬上時政要務言幾之當慎者三以日勤朝講爲脩德之  
幾親裁章奏爲出令之幾聽言能斷爲圖事之幾弊之最  
重者九日治體怠弛日法命數易日賞罰無章日用度太  
繁日鬻官太濫日莊田擾民日習俗侈靡日士氣卑弱日  
議論虛浮勢之偏重者三宦寺難制也宗祿難繼也邊備  
難振也疏入帝褒納中外傳誦焉擢禮部員外郎遷南京  
尙寶丞萬歷初以養親去服除起南京太僕丞復遷尙寶

移疾歸時喬雅無意榮進再起再告闕十七年始薦起尙  
寶卿四遷南京太常卿疏請議建文帝諡祠祀死節諸臣  
就遷通政使秩滿連章乞休不允三十一年冬召拜吏部  
左侍郎時李戴已致仕時喬至卽署部事絕請謁謝交遊  
止宿公署苞苴不及門及大計京朝官首輔沈一貫欲庇  
其所私憚時喬方正將令兵部尙書蕭大亨主之次輔沈  
鯉不可而止時喬乃與都御史溫純力鋤政府私人若給  
事中錢夢臯御史張似渠于永清輩咸在察中又以年例  
出給事中鍾兆斗於外一貫大愠密言於帝留察疏不下

夢臯亦假楚王事再攻郭正域謂主察者爲正域除帝  
意果動特留夢臯已盡留科道之被察者而嚴旨責時喬  
等報復時喬等惶恐奏辨請罷斥帝不問夢臯旣留遂合  
兆斗累疏攻純并侵時喬時喬求去已而員外郎賀燦然  
請斥被察科道亦詆純挾權闕捷顧獨稱時喬又言陛下  
睿斷躬操非閣臣所能竊弄意蓋爲一貫解時喬以與純  
共事復疏請貶黜不報及純去夢臯兆斗亦引歸帝復降  
旨譙讓謂祖宗朝亦常留被察科道何今日揣疑君父誣  
詆輔臣因責諸臣朋比令時喬策勵供職而盡斥燦然及

劉元珍龐時雍輩時喬嘆曰主察者逐爭察者亦竄矣尙可靦顏居此乎九疏引疾竟不得請時中外缺官多不補而羣臣養病省親給假及建言誑誤被譴者充滿林下卒不獲召時喬乃備列三百餘人三疏請錄用三十四年王長孫生有詔起廢時喬復列上遷謫鄒元標等九十六人劾籍范儁等一百十人帝卒不省明年大計外吏時喬已偕副都御史詹沂受事居數日帝忽命戶部尙書趙世卿代時喬遂中輟蓋去冬所批察疏至是誤發之也輔臣朱賡謂非體立言於帝帝亦覺其誤卽日收還時喬堅辭不

肯任吏科陳治則劾其怨懟無人臣禮有旨詰責時喬乃再受事永年伯王棟卒其子明輔請襲時喬以外戚不當傳世固爭之弗聽時一貫已罷言路爭擊其黨而李廷機者一貫教習門生也閣臣闕衆多推之惟給事中曹于汴宋一韓御史陳宗契持不可時喬卒從衆議未幾黃汝良全天敘爲侍郎諸攻一貫者益不悅給事中王元翰胡忻遂交劾時喬時喬疏辨力求罷當是時帝委時喬銓柄又不置右侍郎一人獨理部事銓敘平允然堂陛扞格曠官廢事日甚一日中朝議論方囂動見掣肘時喬官位未崇



又自溫純去久不置都御史益無以鎮壓百僚由是上下相凌紀綱日紊言路得收其柄時喬亦多委蛇議者諒其苦心不甚咎也秉銓凡五年最後起故尚書孫丕揚未至而時喬已卒篋餘一敝裘同列賻襚以殮詔贈吏部尚書謚端潔時喬受業永豐呂懷最不喜王守仁之學闢之甚力尤惡羅汝芳官通政時具疏斥之曰佛氏之學初不溷於儒乃汝芳假聖賢仁義心性之言倡爲見性成佛之教謂吾學直捷不假修爲於是以傳註爲支離以經書爲糟粕以躬行實踐爲迂腐以綱紀法度爲桎梏踰閑蕩檢反

道亂德莫此爲甚敕所司明禁用彰風教詔從其言

明史

鄭以偉字子器號方水萬歷二十二年進士改庶吉士授檢討累遷少詹事泰昌元年官吏部右侍郎天啟元年光宗祔廟當祧憲宗太常少卿洪文衡以睿宗不當入廟請祧奉玉芝宮以偉不可而止論者卒是文衡尋以左侍郎協理詹事府四年以偉直講筵與瑞忤上疏告歸崇正二年召拜禮部尚書久之與徐光啟並相再辭不允以偉脩潔自好書過目不忘文章奧博而票擬非其所長嘗曰吾富於萬卷窘於數行乃爲後進所藐章疏中有何況二字

悞以為人名也擬旨提問帝駁改始悟自是詞臣為帝輕  
 遂有館員須歷推知之論而閣臣不專用翰林矣以偉累  
 乞休不允明年六月卒官贈太子太保御史言光啟以偉  
 相繼沒蓋棺之日囊無餘貲請優卹以媿貪墨者帝納之  
 乃謚光啟文定以偉文恪其後二年同安林鉞為大學士  
 半歲而卒亦有言其清者得謚文穆

明史

鄭爾說字鼎殷崇正進士知建寧縣考最擬補臺班以屏  
 跡權門得工部主政首輔某黨同伐異爾說特上章極論  
 忤旨削職騎驢出都門後補政以罪歸用原官起補癸未

請告還里澹於進取假館於德興縣之南溪鄉為童子師  
 者積二十年一日返衡門塗逢禦人劫衣笈將去審知爾  
 說即慙謝請死其信孚強暴若此

通志

學業

宋

徐斯遠字文卿抱道自守不求聞達藥水心評其文集有  
鋪寫縱送體勢各成詩險而肆對面崖壑咫尺千里又云  
初渡江時上饒號稱賢俊所聚如漢許下晉會稽焉風流  
幾泯議論將絕斯遠與趙昌父韓仲止扶植遺緒以文達

志為後生法

文獻  
通考

按朱子門人有斯遠名而詩文又見稱於藥氏今志  
中王有道墓碣文是其手筆亦可以得其大概云

前志

原跋

按斯遠通志遺載妙貫堂詩話定為玉山人又云斯遠晚第進士自必以登科錄為依據且朱子懷玉硯銘記斯遠以予方訂禮篇持以為贈則其見諸志乘者不僅王有道墓碣也前志因藥水心上饒稱賢俊一語援以入誌故仍兩存之所稱趙昌父韓仲止究未知何邑人而昌父為玉山趙蕃字則上饒自通指一郡而言不當限以邑也

陝邦猷字叔舉文蔚父也賦性坦直不識人世謀譎尤體

物情雖厮役之賤處之有禾盡介然於懷少親師訓肄舉

子業中年謝場屋專課子孫讀書居後植竹數千箇自號

竹林居士婆娑邱園無世間念年九十四而終克齋墓

附黃直卿經竹林題壁詩 陰陰席上雲初斂月映  
窻前綠影餘未向鷺湖分道脈此間舊是竹林居

周伯輝字亮堂號渾齋讀書力行不求聞達惟怡情詩酒

適意林泉與陳克齋相友善往來唱和一時稱極盛焉舊志

徐直方字立大元杰長子性淵靜嗜學尤遠於易度宗朝

舉明經授廣東路經畧使後特授起居郎兼侍講舊志

元

劉光字自謙延祐進士授翰林編脩少承家學一時名士  
爭與之遊稱之曰泉山先生祖養拙受學黃勉齋得居敬  
窮理之要號白石先生光因創白石書院祀朱文公而配  
以勉齋又建義塾置義田以贍鄉子弟之來學者朝廷嘉  
其行誼旌表其門

通志  
前志

游詹字起南少習吏事棄去刻苦讀書郡學舉爲司計憲  
司試藝中程上之行省授徽州路學錄轉教諭太平當塗  
縣學國制以儒官出身必部使者覆試然後命於朝詹得  
書上考除撫州路儒學教授諸生聞詹至大喜以爲得師

詹敬老卹貧脩廢舉墜輿論翁服時江淮兵起郡兵調  
省會詹同郡縣吏守城年已七十氣節愈壯會全家逃樂  
安邑村歿於兵詹以訪舊率於等坂莊所年七十有六

魯撰  
誌銘

明

游質字用文與弟義和同師鄉先輩徐伯宜仲達期以功  
名顯元季版蕩志弗遂含味道腴甘貧自守明洪武初邑  
令蔡仲昭以質經明行脩聘爲本邑訓導毅然以師道自  
任秩滿考績入覲上詢治道以正人心厚風俗嚴風憲擇

守令對稱旨陞新昌教諭興脩文廟教學有法義和字用  
和以太守賀推誠薦攝本邑教諭行部使者每至諮訪政  
教欲舉以大用會引疾卒

李默撰  
行畧

徐觀道洪武初以文學赴召試天地廟社山川鬼神諸論  
稱旨授翰林檢討署吏部考功郎中乞骸陞辭上稱之曰  
善人有遺文藏家今佚

舊志

趙學拙由鄉貢任句容教諭陞襄府教授深為親王禮重  
及致政歸道範式俗鄉論優崇

舊志

周文宇煥章號復齋遊吳康齋門刻意理學不樂榮進以

身率物睦族敦讓歲饑常作粥以活之貧乏終其身

無異爨者

舊志

汪文彪隱居讀書有士行每論古今人事得失必折以理  
不事詭隨學者多宗之

舊志

陳綱字伯文費文憲宏從之遊嚴毅方正克盡師道宏大  
魁天下至元輔以再請告家食先生猶在家塾相見懽甚  
嚴肅如昔或諷之曰門人至貴不當少貶耶先生曰師生  
猶父子也可以貴而加之乎人益賢之自宏以外若方伯  
張公祐司訓費寧冬官費完庶子費宗太史費懋中鄉進

士懋和懋樂皆伯文弟子

費文憲撰墓誌增

方崙字靜夫號石山宏治進士授桐城知縣擢刑部主事以釋冤獄忤璫瑾意解官歸築書院於城西授徒講學肅宗朝命復職會卒勅贈員外郎奉直大夫著有石山集子洋號湘源爲王陽明高弟以貢監授鎮東衛經歷辭不受著有講學語錄今佚

舊志

楊德彪字小虎改字內潛庠生十歲能詩文古今書史一覽輒記倡文社於邑刻信風集行世詞人墨客就質滿座遂於易有看過十七年之語尤善隸篆草書體法遒勁人

多珍之

舊志

徐自定字慧後進士應雷子家世藏書與其弟自寧考訂古今反覆辨難一時名秀多宗之定以癸酉副榜貢寧丁卯闈幾得復失兄弟漫遊四方歸隱桃花灘以詩歌自娛寧尤善翰墨爲賞鑒家所寶

舊志

鄭大璟字婪尹文恪猶子弱冠補弟子員閉戶攻苦雖族中罕識其面者文恪每謂子閉戶攻苦若不惰情山水借資朋友終老學究耳何用乃遊涉四方受知於馬君常倪鴻寶何象岡黃石齋及鄉李孟白姜燕及楊機部己卯鄉

試後遂絕意仕進撰文恪公遺事鐫曰退鐫備注較刻夏  
文愍文集時當事有開禁山之議上十不可事乃寢甲申  
養病永豐雨石山尋卒所著有縞夜堂冲妍堂漏月園念  
一廬鴈外樓諸集兵燹散失為可惜云

舊志

鄭時用字龍臺選貢生少穎異淹貫百家擅詩古文辭授  
東鄉訓導以母老歸養克敦孝道授徒講學杜門著述時  
稱為龍臺先生湖東道陸萬鍾知府俞嘉言皆表薦焉

舊志

國朝

鄭兆湘字楚水邑廩生博淹羣籍治春秋尤得要領每講

子弟曰讀書非徒科第惟窮理致知明省身克己之

待人處事之宜方切實用歲饑變產周卹無德色

舊志

鄭國光字用賓學優行潔知府郭維筦終鑿高銳俱延王  
義學以歲貢授南昌訓導以學行為士林楷模告休歸諸  
生立碑學宮御史朱鳳英為之記子顯宗字嵩年邑廩生  
博文強記孫世仁字澤綿有孝行以選貢

廷試

武英殿行走辛卯領鄉薦

周志字孔球邑廩生家貧力學知縣李世珩延王義學數

人物 學業



年不輕投一刺督學沈舉優行

舊志

鄭天眷字西侯號鵝峰年十七入泮兄某故農家子與田鄰爭水草毆斃天眷奔控語懇直觸縣令怒通詳褫革及縣試天眷易名冠軍復黜之學使傅玉霄聞之復其衣衿乾隆辛酉科舉於鄉益自斂抑與人言恂恂似不能出邑令汪聘修邑志從遊者成就甚衆

楊必芳字懋師增貢生鄉飲正賓早歲喪親遭家彫敝昆弟同濟艱難弱冠從兄肄業德興古塢兩圯獲藏八十餘金悉歸兄以完逋賦晚年營建家祠構書屋於錦灘之西

凡數十百楹族黨子弟來學者皆賴之額曰錦灘書屋  
善蹟不勝枚舉子紹卓乾若捐職州同事繼母如生母克體親心行善不倦性喜交遊於人士之賢者尤加愛慕云  
汪煒字彤有邑庠生家素封持躬謙讓造次必循禮法弟沒撫姪有恩姪沒復撫其孤族黨媼戚貧困者煒能探其意而緩急之好讀有用書喜賓客郡人士賢者多從之遊數音僅以貢成均終

余化鱗潛心經史力學不倦以貢生授教諭將及抵任而歿弟之璫邑諸生有學行先化鱗卒藝林皆為惋惜

廩生劉球字上玉性嚴毅不苟隨俗刻苦勤學貫穿經史  
科歲試輒冠一軍縣令程光鄂重其文行暇卽延訪焉然  
終不遇卒年七十九子鳳起庠生孫毓秀辛卯孝廉  
毛汝亮字九功歲貢性超邁嗜學作文喜馳驟而準繩自  
立素靜重諄諄以敦骨月化鄉鄰爲事臨終惟以讀書積  
善勉其後云

張廷鉉字青來幼慧常依祖父聽議論能解悟出語問難  
多中窻會讀書誠懇弱冠遊庠序儕輩咸以偉器期之廷  
鉉益自憤發以攻苦成疾年四十一卒士林惜之

宦蹟

宋

徐珣字溫甫高宗朝進士授辰州教官爲刪定編脩轉池  
州判官有美政尋致仕通志

余時言字知默徙居浮梁紹興進士授安豐軍教授歷仕  
內外臺府有能聲贊上親征隆興初知漢州值蜀大歉所  
部獨登出粟活流民二十餘萬終敷文閣待制通志

按時言前志遺載但通志謂爲上饒人自以登科錄  
爲斷故爲補入

楊抗字抑之以才畧薦用嘗知盱眙紹興辛巳爲淮西運使錫山尤表爲著事實子恂字信伯登進士第文學推重於時舊志

徐珏字叔寶寶祐間爲餘干令每決疑獄人頌神明人物志

元

祝堯字君澤博學能文著述甚富延祐進士授南城丞改

江山令陞萍鄉州同存心撫字獄清訟革吏畏民懷舊志

方思廣字可大至正三年知連州增學田立義塚勤撫字

吏卒無敢恣者既去士民紀績學宮至今尚存舊志

童文傑字庭川二都鶴巢人元至正甲午舉人令長樂

廉能著調仙居卒於官初令長樂時惠政下逮去之日民

不忍捨繪真祀之仍別寫小炤題咏德意進之以示不忘

至今子孫珍藏焉舊志

明

許穆洪武初以明經薦任政和縣丞多惠政以廉能稱穆

承政和得磁石助廉事詳具嚴從簡周咨錄真臘傳中舊志

按磁石助廉語簡而聯片例內所謂非註不明者也識之以俟來者考訂

游志遜洪武間以廕授廣西興安丞入朝作應制詩擢御

史舉劾不避權貴上稱忠直御史陞四川僉事通志

王自牧洪武間以人材用歷官至兵部職方司郎中永樂

三年從英國公出征交趾卒於軍人物志

楊廣仁永樂間任虞城縣令百廢具興兩賜應禱嘗以累

繫獄百姓詣闕白其寃得釋仍詔還職尋擢河南僉事及

卒老稚遮迎其喪泣送者千百人舊志

鄭雅字仲平以監生調和鄉簿之官以一僕自隨每與令

長部使者爭不便面頸時時發赤繼判安節奏蠲逋稅病

革戒僕飭後具無受賄歸裝一徹篋朝祭服外家訓十四

條而已孫毅舉進士累官御史以治行聞通志

李奈字景春舉進士歷官吏部二曹淳博知大體擢廣叅

政協贊兩廣軍務韓雍平徭之役奈與有功焉通志

蔣溪字子川由進士歷官兵曹出知福州府境內大治郡

有靈濟宮例遣中官歲易時衣糜費供億以萬計溪奏請

以有司行禮罷中官通志

方崇字遜夫成化舉人未仕時授徒講學弟嵩從弟嵩增

鄭毅皆從受業一時及門登第者甚衆後任德安府通判

以弟嵩忤逆瑞慨然掛冠歸舊志

人物 官蹟

陳結字廷章成化舉人宏治間任兗州府教授丁艱歸當道咸致禮幣補任寧波提學趙寬嘉其教範諭兩浙師儒法焉陞黔江知縣發民塔木宋者爲黔積患紳至以德化之黔民遂安尋謝病歸

舊志

楊福字伯昌由監生拜藍山丞隣邑安仁衡山民獠錯居告訂視藍滋甚歷幾官不能平部使因奪其篆而以福署之既至不數月績用茂著將遷秩移疾歸子麒舉進士累官南工部尙書譽望推重於世

通志

鄭毅字立之宏治進士累官至四川巡撫擢兩淮總漕所

一在政聲赫奕爲當時名宦著作甚富燬於火

通志

一李艾字子芳號靈巖嘗師事婁諒諒雅器之有讀殘蕭寺三更月踏破青山萬里雲之句宏治乙丑成進士選庶吉士授浙江道御史會土官岑某以罪逮獄厚賂諸權貴貰免艾廉得其情竟寘於法逆瑾怙勢率同列伏闕叩諫獲罪繼按獄粵中洗冤牘無算丁內艱歸結社於城西周公墩與士大夫賦詩其間孫仲顥字儒貞由恩貢歷官漢中知府先是顥任襄陽府丞官兵進勦山寇顥隨營給餉會師失利被執曉以大義賊皆感愧釋之進福州知府惠廉

兼著士民有三山頌言舊志

楊麒字仁甫正德進士歷官工部尚書積學能文隨事輒

辦嘗建盧溝橋今往來者德之通志

桂榮字君用以舉人歷官至監察御史按部湖廣摘發如

神自旦至暮斷獄百宗立釋疑獄數十人一省以為神善

詩歌古文辭有桂軒詩今佚府志

王建中字懋德號信南生八月而父逝母毛氏和丸課讀

嘉靖甲辰領鄉薦授浦江令丁大母憂起補潛江令築湯

家等隄以障江濶遷大興尹市地建屋以棲貧民會臺省

交薦授比部郎推心平反全活無算擢知大理府滇俗有

同姓為婚者首厲禁之歲例有椽金七十兩為太守壽勒

碑禁革尋人覲解組歸退休十餘年卒八十五舉祀鄉賢

有集行世舊志

鄭邦福字洪範號鐵耕隆慶進士授嵩明知州政尚寬大

滇人德之陞水部司副轉任曹郎奏使郵楚囚多所平反

尋補福建僉事遷粵東兵備時海氛方訖邦福至嚴斥埃

謹巡邏備禦有方人倚為重晉南岡鄉卒於道舊志

王夢賜字鰲磯高麗進士授安慶府推官時郡有虎食人

夢賜爲文禱於神三日虎自斃以丁艱歸尋卒舉祀鄉賢  
舊志

方之北字文斗號拱垣萬歷乙酉亞魁任望江教諭遷景  
寧知縣適歲旱禱於敬山宮甘霖立沛邑稱大有遷澧州  
知州致仕歸講學石山書院吉水鄉南阜嘗贈聯云雲中  
彩鳳翔千仞林下春風第一人  
舊志

余桂夢號毓蟾萬歷舉人初爲彭澤縣教諭遷孝感知縣  
廉惠有聲遷巴州知州邑有寒士夏時亨者每夜讀篝燈  
達旦桂夢出巡夜訪知其貧分俸助讀時亨果成進士稱

爲知人在任四年移疾歸  
通志

徐士俊號六石萬歷甲午舉人任六合知縣以治行徵授  
工部主事進刑部員外獻璫獄陟幽廢一時稱爲健吏陞  
鶴慶知府未任歸築室林泉以壽終  
舊志

楊聞中號尊止侍郎時喬子以蔭授工部都水司主事尋  
權荆門稅師先侍郎權武林關法一無所擾陞南寧知府  
解組歸以遊武彞山水會邁疾卒於崇安之天竺庵  
舊志

黃清起吏員清勤積官嘉興府同知加四品服俸築海塘  
有功後以運司治高寶河堤積勞死於寶應之寧國寺至

不能歛事聞贈卹有加通志

方應瀚字養冲號北溟萬歷舉人初授崇仁教諭邑有黃金鼎者單寒分糈養之踰年脫穎去遷隰州牧值旱飛蝗蔽天乃教民以姚崇捕蝗法蝗遂息轉山東濮州先是妖賊王好賢徐鳴儒倡白蓮教流孽山東濮州爲甚瀚至擇捕密授以計混賊中盡得其情乃潛兵撲之前後俘八百餘人黨遂平大府命籍其產令民得買以補透支餉費產值倍於餉瀚賤價以售民有皂旗夜指白蓮散萬金不染寒冰膽之謠在任二年謝政歸蔬食布袍怡然自得嘗作

詩曰三月無鹽常食淡一家露肘屢啼寒庭前一望

洗剩有南窻竹數竿兩與賓筵卒

舊志

徐久德號裕元萬歷舉人歷官至四川敘馬澂兵備副使值奢崇明倡亂變起倉卒久德百計綢繆練兵措餉設間招降凡五閱月州縣俱平致政歸年八十餘卒通志

王廓字孟侯號借五給諫讓之孫通守衮之子崇正辛未進士筮仕得文選爲有力者所阻以刑部郎恤刑八閩全活無算陞廣西督學轉金衢嚴紹大叅一攝藩篆兩署臬司功著兩浙晉太僕卿歸終南村之雲霧山生平勤慎雖



位列罔卿而傲衰羸馬猶同寒素終身不置妾婢五子

壻諸孫林立皆擅文名

舊志

國朝

王熾字炳若順治舉人授南昌府教授康熙戊午聘校楚

闈尋陞洪洞知縣洪俗尚奢侈熾力挽其風凡婚喪讌會

之禮酌定八十二則名曰思深格言俗為一變其年丁艱

歸服闋不起徜徉山水十餘年卒年六十七著有吾廬藝

草菊洲詩文今佚

舊志

桂天申字重禧號愚山明御史桂榮之裔也穎異多識由

歲貢授定南訓導遷吳縣丞時 大兵入閩道經於蘇天

申經理橋路以功陞雲南南寧知縣年老致仕歸與賓筵

卒年九十七著有四書經濟說史論雜記草蛩吟今皆佚

舊志

鄭天祉字錫茲號退齋以歲貢任萬年訓導博涉羣籍見

忠孝節義之事必手自抄錄暮年猶能作繩頭小書不輕

易涉筆官萬年訓導教學有法時庶常聶位中尚為諸生

天祉閱其文調厚重有後福良然春秋八十以壽終子緝

字于素歲貢生文章有法度上玉興三庠知名士多出其

門舊志據採訪合傳

潘翀字一飛由拔貢任浙江三江場鹽大使竈田潮冲狎申詳題請准豁民德之未幾卒於官議者惜其設施未竟

焉舊志

孝友

宋

徐中行字元立政和進士唱名日自陳其父年八十九願以所應得官回授上曰此可厚薄俗詔其父別以官命之

通志

按唐書孝友傳序有上僥鮑嘉福虞鏞真皆以事親居喪盡禮詔蘇門閭賜粟米前志採信乘續葑謂上饒舊志有鮑嘉祐祐字疑福字之誤又有鄭鏞虞鏞而無虞鏞真亦恐一人誤作二人或別有據云云夫

人物 孝友

考誤必存其本文今舊志已無可徵則後來纂所據以核實且嘉福銘真通志亦遺載

游覺民字必先宣和間領鄉薦大觀初朝廷設立孝友睦  
嫺任恤中和入行大科搜羅遺逸詔諸路監司守臣各舉  
二人覺民應選赴廷試上舍釋褐登第狀元賈安宅榜由  
將仕郎新淦縣主簿歷官朝奉郎通判温州以父母俱不  
逮養宦情雲薄乞致仕卒年八十有八弟安民有至性初  
母令人金氏喪未得吉壤覺民忽夢人言傅家塘南峯山  
可葬安後世蕃惟次房不利既覺與諸弟言之安民喟然  
嘆曰母停柩數年煢煢在疚倘獲吉壤死且甘心何不利  
之云誓必葬之後四世果無傳

鄭夔字景南建昌南城學判優於學行居鄉孝友賑貧周  
急鄉鄰德之淳祐二年春旦忽大雷電有金龍凌空而下  
入其家化爲銀錢悉進於朝授迪功郎賜本都官庄坂田  
若干石至今子孫蕃衍世名鄭家坊

明

汪仲庸名誠道文學該博事母以孝聞水樂間爲金華教  
授入朝上詩乞移就養調本縣訓導

按通志載有王庭槐以孝義稱舊志失載附識於此  
國朝

王德潘字為澗邑庠生早失怙家貧事母至孝每食必俟  
母先會母病焚香祝天割股以療以權兵燹雖重蠶十舍  
必負母以行居常之食采薺蕨充膳終身如一日順治十  
年知縣沈獅上其事前後巡撫按皆給銀絹旌額舊志

按明太祖命禮部定議自今卧冰割股不在旌表之  
例而有宋大儒真西山崇尚風教有黃章割股救母  
吳祥取母教父皆行支賞雖或為名高亦足以風世

云耳茲仍前志不沒其實其他無事蹟可紀者類志  
之

周毓華字光仲父結如由國學官司城遭戊子亂客苑德  
興黃柏塘藁葬馬墩洲時毓華方幼扶母歸越一十七載  
往收父骨封樹莫辨禱之神有徐老人指示獲骸以歸知  
府曹鼎望司馬侯七乘司李黎士宏皆以詩表其孝感毓  
華亦著風木吟以自傷舊志

鄭世禮字周備邑庠生事父先意承志甲寅父為賊拘勒  
餉幾半載禮不避艱險脫父於難禮逝婦潘能承夫志孝

養舅姑如禮子惟鈞及諸孫多遊泮

舊志

鄭從華字德英爲人卓犖自好康熙甲寅閩寇至掠其姪九穎去尋訪載餘重金贖歸鄰有富室藏金於從華塘水道中掘溝見之不取偵知爲鄰物告使取之厥後孫天眷舉於鄉人以爲行義之報云

舊志

鄭一麟字若麒清潔自好甲寅寇脅之從不屈寇平勤理家產妻俞氏緝佐之兩弟迭喪撫姪成立給以亡業子國

光任南昌府訓導

舊志

鄭紹淳字重姿號素軒性穎敏博學仗義式俗雍正乙卯

科選拔

廷試畢奉

文在監肄業候選聞父患瘋疾

歸侍藥調食四載不假僕婢形容消瘦人爲危惵淳不自覺也父卒母及弟疊喪遂不復志功各倡立文會捐資置產教鄉子弟終始不倦文風爲之一振值歲饑米價高昂傾倉平糶知縣汪給匾旌賞里有葬父侵其地或以告曰人各有父助之可也里黨咸稱焉

鄭再興貧甚父遺洲地兩片可獲粟數石母年六十得癱病四肢不舉且必爲櫛髮纏足便溺必候時扶抱問飲食而敬進之衣裙屢必謹濯之凡挹搔沐盥溫席扇枕刻

不懈如是者十五年田作外有事他往致延緩半日者決不往也乾隆甲午觸熱浴水猝死距母終五載

鄭行健名學乾中書祚遠曾孫也生一歲而孤家產素豐遺命屬從父某經理有女兄長十齡前母祝出也生母紀性嚴毅行健四五歲時姊或受笞督卽纏母裙號泣母亦往往哀止年十八從父始畀以家政旁人交構謂侵漁獲利無算行健終以代理爲勞德叔父不置乾隆十六七年旱饑薦至穀價湧翔流殍載道行健傾囷倒廩劑量以賑減價而糶賴以存活者甚衆人謂克承祖德焉

汪寧遠字靜夫號澹菴貢生少孤力學弱冠赴鄉試聞舟病篤星夜馳歸舟過鄱湖阻風滴血告天禱畢風息抵家晨夕調護母竟無恙生平義方訓子樂道人善嘗獨力營建家祠族人興於禮讓其他陂堤津梁諸善舉識者謂皆緒餘云

周鏞字武遷母程氏守節撫孤鏞出入必告孝行著聞甲寅閩變爲賊江機所擄將加害詰以姓名賊感其孝而釋之知府匾旌之曰母節子孝子浩字裔昌邑庠生以孝友奉家里中有吳姓者貧將鬻妻力止之且備饘其家至今

吳氏子孫能道之

游城字盛民善心計服賈力養兄弟分爨已數十年臨終出藏金七千有奇分給諸弟歲饑出粟六千石賑濟里人德之

紀耀昌字又昌號靜齋恩貢生生平力學老而猶勤事繼母竭力承歡事兄長推宅讓產導引子姪及鄉先進以交行相砥礪邑有公務當事委重焉兩舉優行列鄉飲正氣長子徵善庚子進士次應善貢生俱能承父志急公恐後人以為積善之報

鄭志廷字懷赤幼讀書戊子己丑兵荒棄帖括徜徉邱壑子正宰字公輔母病篤步禱九華與父並以孝友傳孫養瘠字濟川附監生居心誠樸鄉鄰推為長者

鄭森恕字肩仁邑庠生性恬澹嗜學少多病恪守父命節飲食寡嗜慾謹身飭行不登高臨深年不申壽固非所召致者業師董醇以金玉稱之

蔡振宜歲貢生有學行子應科字首掄邑庠生幼失怙恃赤貧如洗矢志先業潔清自好不入城市鄉黨重其高節劉必達字顯臣天性孝友弱冠喪母事繼母尤加敬愛母

前夫子至知母有私惠謹避之母語及則請益以贈之族  
曾孫從子無依者代爲撫養婚配成家乃聽其去同邑舉  
人鄭天眷學行素優必達高其詣相契甚厚病危以身後  
事委之卒年七十有五

鄭允培字永鄉號丁峯少失怙兄亦弱齡事孀母盡孝比  
長以父事兄歲臘母命索店租兄故與租店者有隙謂曰  
租錢不如數無歸永鄉僅收其半遇兄於市告以故兄以  
短收撲之凡三次跪而受見者垂涕兄怒亦爲之解歡聚  
五十餘載分爨之日唯兄所命至今里黨猶能言之

忠節

宋

徐宗仁字求心元杰族子也淳祐進士官國子監主簿開  
慶元年上書極論邊事又論董宋臣盤固日久蒙蔽日深  
又請有言責者皆得盡其言累遷考功郎兼崇政院說書  
國史編脩實錄院檢討德祐元年授吏部侍郎中書門下  
檢正諸房公事權禮部尙書兼益王府贊誦衛益王走海  
上厓山敗死焉史論曰宗仁國亡與亡與枋得欽崎以全  
臣節皆宋末之卓然者也

宋史

人物

忠節



按宗仁號芳溪追諡忠肅舊互載永豐今考宋史及家譜補入前志原跋

元

陳受事母至孝至正初伯顏不花的斤守信知受有勇力募為義兵累以戰功擢千長會陳友諒來攻伯顏不花的斤自盡受尋戰敗被擒痛罵不屈賊焚殺之元史

明

鄭祥遠字一士世居沙溪二世祖以靖難兵起挂冠潛遁後遂不大顯祥遠家貧素饒仗忠義喜讀書遭時孔棘息

意於功名處族登濟急扶困無分毫顧惜而於宗譜尤兢兢黃道周由閩至信過沙溪得祥遠喜甚祥遠傾貲佐道周道周被執祥遠死之

附黃道周鄭氏宗譜序余膺命由閩至信時鄭生祥遠仗策來謁忠義之氣凜然令人起敬偶憇生齋見書卷狼籍檢舊笥得鄭氏家譜一冊閱其世系祖籍濠上繼隸徽郡舊有分合二譜其所載人物類與國史符合逮遵信饒沙溪著有支譜其一世出元勳二世仕建文朝緣靖難兵起遁跡潛名至三世守父遺志不求聞達此又國史所不及傳而幸於其家譜覩焉未窺全豹已見一斑流連久之不忍去值生適至見余閱其家譜因乞序焉嗟乎當此國事孔急之秋遠以一介書生非有高爵厚祿而仁孝精誠直可貫金石而泣鬼神以是知其有自來矣語云忠義之士必出忠義之門今閱其前之高風亮節若彼而生之

人物 忠節

仗依赴義若此古語不信然予余與生行將抵江南  
成敗利鈍未可逆料留片語於譜俾百世下知其忠  
義代有傳人詩曰夙夜匪解無忝爾所生余願鄭  
氏子若孫引之勿替自當綿世於無窮也云爾  
按家譜入志必以其族之有學行者所作乃可徵信  
沙溪鄭譜有黃石齋序雖未載入本集然石齋至發  
源旋被執其文自無從編次簡樸有體非時人能贊  
為之者石齋寸縑尺牘固足寶貴而辭遠死事得此  
愈足傳信故附

錄存文日定

國朝

周元字孟祥任雲南騰越副將吳逆叛署元偽總兵不就  
退居永昌大兵至蜀元與永昌偽將軍田進學偽總兵李  
鍾秀同謀反正鍾秀舉兵北勝元與進學舉兵永昌恢復

順寧府雲龍州賊兵壓境眾寡不敵元被執不屈遇害

通志

隱逸

宋

游元英字俊卿別號西軒居士遊鄉校錚錚有聲自謂取  
科第當如拾芥大比試輒不利累應詔但爲國子待補生  
因嘆曰命矣夫浩然賦歸耕居士警悟機敏勁挺不阿狃  
才實有用自坎墮於時無以自見始卽其家而經理之居  
無何荒者治溼者通缺者備觸事皆有端緒於是自適其  
適蒔花植竹飲酒賦詩遇佳天氣勝時日與賓友相羊園  
亭中無復身世之憂瀕卒獨惓惓於八十四歲老母語不

及他年六十有二卒 克齋文集

元

楊亮字叔明元高士也與錢惟善為友子觀至順二年進士為翰林院檢閱亮卒錢惟善輓詩有身入波濤親在念思沾雨露子登科之句載江月松風集 楊文安集

明

周日庠字倩六十三補郡庠工音律書畫尤精天官家言論雨晴休咎無毫髮爽明懷廟崩即作書與友人訣別飄然出門去莫知所終 舊志

鄭忠字吉夫幼聰穎十五入泮十六食餼試每冠軍

國初隱大平山著述甚夥甲寅盡罹兵火 舊志

國朝

祝雷聲字震默順治丁酉舉人端方古樸不妄交與以著述自娛十三年閩變遯跡不出康熙二十三年知府孫世昌延脩郡志壽九十三無疾而終 通志

余清字青子號梅菴壬子舉人時值閩變絕意仕進授徒講貫潛心理學壽七十四著作散見羣弟子記錄 舊志

徐遼字子上有學行不求仕進著有靈岫集貧未刊行 舊志

余淳字應川優貢性恬退喜讀書學優文富著有存疑集  
爲當事所推重然雅不樂榮利自築古柏軒廣植花卉與  
二三知己恬然吟咏以終

義行

明

章敬思毛孟彰正統六年饑孟彰出穀二千五十石敬思  
出穀二千一百石賑濟知府金銑知縣王誼錄其事以聞  
旌爲義民仍免本戶雜派差役五年今勅尙存

舊志

章敬端章善宗章善能皆敬思族人景泰三年饑端出穀  
六百石賑救恩賜七品官職宗與能亦師其所爲出穀六  
百石朝命立石記義至今石存里門

舊志

朱仲舒字克明世居水南上鄆沉密有志自耻身爲齊民

無由建白乃置義田以贍族之貧而無養者立義學以教族之貧而無師者御史蔣欽為之記未軒黃公督學至郡造廬訪焉子汝陽任楚茶陵歸承父志贍里族不衰尙書楊麒有記舊志

周烈字顯章景泰丙子歲歉傾資恤族隣有司上其事賜義民坊於其里舊志

童伯熙字德明邑庠生輕財好施景泰四年饑捐穀六百餘石接濟鄉里專闢旌為義民勒石誌之今石刻猶存舊志周誥號松亭古梁馬邨人嘗建義學置膳所以待學者歲

饑設粥活衆後結精舍於墨山之陽與婁諒夏尙朴輩歌詠徜徉至老不倦三與賓筵卒年八十舊志

鄭道陞字南山業儒會戊子己丑兵荒棄帖括隱居鬻產濟人子志達字隱公能繼父志好義不衰卒年逾八十

盛廷梅字景初執禮恭謹樂善好施上憲屢旌其行藁福正品端行潔藜尙高性淳厚樂施與與余激余瑄周文六

余文會俱列賓筵舊志

國朝

周十三同姪周五三康熙十五年大兵恢復信都分兵南

鄉撲剽餘孽先是周叔姪爲賊兵所獲勒令引路搜掠婦女周實知所在佯辭不知割其股肉炙而噉之叔姪相語曰寧死無陷害千百人也兵怒益剮其股肉殆盡而死惜二人俱無後

舊志

鄭文綸字宣之順治戊子饑米價騰貴文綸出穀四百石

賑之

舊志

鄭祚元字公允學甚富不樂仕進康熙十年設粥賑饑全活甚多丙寅水災又出穀救之

舊志

祝麟娶龔氏麟年二十五而龔亡終不再娶康熙十一年

饑者廩賑之子姪未娶者竭力畢其姻子圭湖口訓

盛柏字鶴齡甲寅避寇居玉山三十四都有鄭某妻被賊

掠貧不能贖柏慨贈四十金終不取償柏無子年六十六

而生子壽八十九

舊志

王焯字幼宣年未四十而鰥不再娶生平好周人急寄居

興安興之民目爲長者

舊志

姚應章龔大魁樸厚自持鄉鄰重之趙繼瑞心存利濟年

九十邀

恩賞資督學沈扁旌之

舊志

鄭詔斗字北樞資生性和而介積學安貧嘗受知於郡守

張國楨後守望吏議罷斗率同志走秣陵白之其仗義若  
此舊志

余洵邑庠生性和易喜施濟邑東賣糶獨成石橋又首成  
通濟橋事見黃中驥記康熙丁丑歲歉洵穀盡買穀以濟  
鄉里子肅歲貢生能繼父志樂善不倦舊志

王世鑿字子覲性淳謹好施與如三十八都五桂山保母  
嶺下凡諸石橋皆獨力成之庠生鄭祚基恭謹自持不纓  
勢利能緩急人尤以教子爲急子三皆爲名諸生前志

王學逸字士敏少孤於昆弟行齒最幼及析產惟兄所授

曰予藉兄成立卽此所有皆兄賜也性慷慨好施與於讀  
書之士尤尊敬而優禮之年四十餘以軍戶承運有溫姓  
者貼軍也僅一子應貼十金密甚鬻其子以濟學逸聞之  
還金贖其子辛未歲饑平糶以濟鄉鄰子勲進士官始興  
知縣補保康知縣學遜前卒於署 贈文林郎父大經  
貤贈如其官

張煥字德章監生乾隆五年郡建靈溪橋歲終難以集貲  
煥獨力加捐歲事九年橋圯十八年重建續捐貲二百金  
十六年荒歉散錢賑給鄉鄰凡義所當爲者必爲衆倡之



至老不衰知府福贈匾曰誼篤粉榆年七十二卒子堦優  
監生有父風

汪之濬字若濱力於爲善有才幹爲衆所推康熙年間知  
府周建造鍾靈橋委濬董其事或勸以捐例入監笑謝之  
以布衣終其身子鄉賓元材簡臣元楷國書俱能繼父志  
勇於爲義孫煒光自有傳

陳子秀少貧爲人牧中年生二子長卽分析令各謀生益  
勤力耕作或謂無兒女累何太自苦秀曰吾將以有爲也  
所居鄉地名長洲有木橋累興累廢秀積累十餘年費金

數百鼎建石墩九座上駕以木行旅稱便又數年置租田  
十餘頃永爲脩橋費會衆立碑不許子孫侵壞卒年八十  
有三

鄭養潔字孔與號克齋考授吏目天性醇厚聞族中有力  
學者敬而愛之置田數十畝以資膏火鼎建五桂山高勒  
兩地石橋其他給絮施棺建亭脩路善蹟甚夥郡守劉堯  
裔給匾獎曰心存宏濟年七十有八無疾而終

王惟一撰墓志

余作霖字沛功授職州同知宋儒正叔裔孫於其祖讀書  
故址雲巖山築室置田爲鄉人來學者膏火之資乾隆八

年歲饑減價平糶粟垂盡復市穀以益之不能糶者貸之  
後十六年三十年平糶

撫陳宏謀扁獎曰惠遍桑

梓太守陳世瓚給榜獎之曰如余君者可謂正其誼不謀  
其利之君子矣

余琳字孟玉附貢生乾隆十六年歲饑傾困平糶獨力鼎  
建沙溪龍門額橋一座脩復土溪石橋一座雞母山石板  
路百餘丈已沒人頌其義不衰

余成龍字上雲考授州同余璉字商玉龔珍字聘三俱監  
生歲饑出粟賑貸義所當爲無不欣躍從事俱經郡縣

勵璉不奪佃田不受佃利亦爲鄉鄰所樂道黃國魁捐祖  
穀以惠桑梓脩橋梁以利行人舉鄉飲賓

鄭正官字任賢康熙間太守周造鍾靈橋首委任焉兄弟  
有四人皆讀書不善理家正官撥己產數十畝以佐讀鄉  
鄰貧不能娶者傾囊助之舉鄉飲賓卒年七十有五

徐可學字希聖有隱德曾市山距宅二十里形象咸誇爲  
吉壤近山有冢家魁葬之或報可學鳴諸官可學曰彼利  
吾風水耳果有耶是彼有隱德而天默牖其衷也如果無  
耶彼不久將自棄吾何控官爲且生者可罪死者竟何辜

越數年葬家竊視之果不利私負其骸而去近都周氏有  
宦塚青版纍纍子姓奇宦 矧之者願發藏更納棺可

學聞知徑詣周詢其直曰三十金可可學如數償之且曰  
吾必爾全塋著券周子唯唯押券袖而歸踰年可學母故  
廵青烏家相地子弟以周舊券告可學曰吾豈利彼福地  
哉向之所以購之者蓋以絕鄰家覬覦耳塚落吾券而後  
周墳可無恙也常曰吾生平無他長只學得喫虧耳吾願  
子與孫世世能如老漢也年六十有九卒

李輝捐職州同本姓汪父元材以姨甥出繼李氏後李氏  
舉子有孫元材命長子輝歸宗仍俾輝爲李氏後輝敦朴  
有長者風足跡不履公庭好施濟鄉人德之

余如璋字騰雲增貢生父作霖有義方恪遵弗替族祖某  
家貧年老娶妾生一子子殤妾復病璋爲廵醫並給藥貲  
得愈後卒舉子孟顯達有媳病劇求施棺詢其病可治施  
以醫藥病果痊璋子勝多男貧無以育將鬻妻璋目鬻母  
以贖子若人道何給穀完之母子至今歡聚其他義舉多  
類是子墟崑埔有父風

盧懷珍雍正十一年捐租百碩於弋陽晚港橋乾隆元年

捐建邑西路三十八都羅橋九洞二十七年圯於水子錕  
復捐金脩造靈山天堂  
可數祿膳僧施茶三十三年  
減價發糶知縣劉獎以好義可風以監生膺鄉飲介賓  
鄭紹瀚字繼遠穎悟過人弱冠補弟子員爲人豁達和平  
不計瑣屑租稅有定額瀚不論豐歉得半而止歲以爲常  
中年後絕意功名遍閱形勝寄傲於山水花鳥間浩然自  
得卒年逾六十

鄭紹瀛字亦昭邑庠生少好技勇有才畧任事不避艱險  
族多積欠丁糧瀛破產代爲輸納有中表爲牧牛者債逼

鬻妻卽贈以牛二變價償債妻得以全年不中壽而  
黨感惜之

毛振鰲鄉飲賓樂善喜施治家嚴整有法太守周錞元獎  
以里稱善士匾額其孫元餘元劍皆諸生能守家訓自振  
鰲以下凡六世男婦八十餘人合爨同居未嘗分異人稱  
義門云

余昌字西屏邑庠生事親以孝聞其父素嚴惟昌先意承  
志得其歡心凡甘旨供設其妻鄭氏亦佐之惟謹性樂善  
喜施乾隆辛未歲饑昌傾貲減糶無德色知縣鄒應元獎

以嘉惠桑梓匾額嘗獨修玉邑石岩橋及本邑東灘嘴橋  
其爲人完聚室家并資貧友成室諸義舉不勝書于六俱  
以文學著

余坤少負才氣入成均屢試棘闈不利攻苦抱病遽卒先  
是辛丑歲與弟生員峯承父人璫意捐西洲庄田廿六畝  
人信江書院并增葺雲岩正叔書舍當事嘉之

徐維均字秉臣介賓事親先意承志四兄一弟怡怡一堂  
善治生初產薄殫力經營日漸充裕生平樂善好義凡族  
戚窘迫者不惜解囊子宸鏞附貢有父風

姜士鳳字鳴岐幼失怙治喪禮如成人既葬獨卧墓側母  
氏桂撤具令歸則躡踵大號行人動色士鳳先貧後裕捐  
修大嶺水晶嶺及北谷嶺石路數十里貸穀減息荒歲減  
價不能償者還券年四十四舉四子稍長各課以經史手  
抄口授俾曉大義卒年八十一長子際聖庚辰舉人其三  
均列膠庠

周紹漢字倬雲太學生純樸有至性事親孝養備至然素  
好善樂施與捐建橋梁亭道不可枚舉乾隆三十年歲大  
歉紹漢出穀碾米減價平糶其妻朱氏亦領奩具佐之遠

近賴以存活者甚衆知縣劉埴獎以匾額後凡遇荒歲不惜傾貲子銓監生有父

方技

宋

葉子仁善推算占筮言如破的歲乙酉真文忠方在班子仁以書勸外補甚力未幾果去國子仁每推論五行輒以善行相勉真文忠以為有君平風嘗贈詩云易象推占妙人神勸人忠孝更諄諄只今誰似君平術惟有南陽賣卜

人舊志

明

林森資性靈朗博覽異書家世業醫郡舉任醫學正科活

人物 方技

人之功最博

舊志

周詔字天章爲人俊雅出塵輕財好義嘗於江湖中遇異人授以地理指掌圖盡得山川原委脈絡之詳以是遂於地理四方諸名公卜宅者率倚任之蔡虛齋先生稱其談論符經義脫世味有近道之資欲論薦之未果因爲作贊序以見意

郡前志

國朝

潘奭字奭之少工詩畫落落有異趣長遊南國與四方名流友善得石田雲林筆意喜作畫不易與人嘗自攜詩歌

一卷長汀黎愧曾爲之序平居儉處輒有東方曼倩之風年八十餘無町畦蓋高詒之流也

郡前志

汪光字月坦邑庠生精岐黃術祖父本素封鄰姬子病亟家貧不能延醫往訴光室人丐光診視室人以告光屬飯鄰姬先往其家探視出囊中參附丸以療之歸則鄰姬飯方畢告之故贈以錢米而遣之族子靜夫以公謁郡守門子進茗飲手杯墮地不自覺倉卒垂斃郡守命昇於客館醫者謂當亟進參芪光以邪雖乘虛而入顧不先理其標病不可爲也衆醫阻之光力排羣議以辛劑藥之果痊年

七十餘生平未曾服藥無病而終

林世珍字尼望監生弱冠失怙撫諸弟有恩擅岐黃術城西四十里周某患喉癘延醫不愈將危素慕世珍名星夜相迎適世珍自罹重疾不能往迎者備述病人望救之切得一往雖死無恨世珍謂諸子曰余雖負病尙未至死倘得活人一命是余所願寧負吾無負人也往視之不數日卽愈世珍路冒風寒病益篤闕兩月遂殞

寓賢

唐

陸羽字鴻漸一名疾字季疵復州竟陵人上元初隱居苕溪號桑苧翁召拜太子文學徙太常寺太祝不就寓居信城北三里自號東岡子性嗜茶環居多植茶因號茶山刺史姚璩欽慕其風類就訪焉嘗著茶經三篇鬻茶者目爲茶神祀之御史蕭瑜領洪州羽自信州移至洪州玉芝觀瑜喜與之唱和成帙權德輿爲之序

豫章書  
郡舊志

宋



鄭望之字顯道彭城人少有文名靖康初再使金營累官至吏部侍郎以徽猷閣直學士致仕僑居上饒匾曰寓屋弟資之字深道仕至吏部侍郎亦居溪南嘗開山路成兩巖對奕其上名壽松巖

呂本中字居仁紹興進士累遷中書舍人兼侍講嘗同秦檜爲郎檜旣相有引用意本中封還除目尋以草制忤檜

諷御史劾罷屏居城北茶山寺僧建祠祀之諡文清

舊志

辛幼安名棄疾號稼軒其先歷城人淳熙間卜築邑之帶湖紹興中授太平軍掌書記後歷官兵部侍郎樞密都承

旨卒德祐初贈少保諡忠敏

舊志

曾幾字吉甫其先贛州人徙河南初授將仕郎累遷江西提刑會兄開忤秦檜和議怒遷于幾罷歸奉祠僑居茶山寺七年杜門謝客經年不入州府自號茶山居士檜死起爲浙西提刑知台州尋爲秘書郎幾承平時已爲館職屏去三十八年而後出特賜權簽禮部侍郎孝宗受禪屢請老乃遷通政大夫卒諡文清宋史論曰幾積學潔行風節凜凜陳膏肓枕戈之言以贊親征亦壯矣哉

郡前志

按一統志以兩賢堂爲呂居仁曾逮及考宋史本傳

遠廼文情次子乃知志誤今參據韓元吉兩賢祠記

改正之原

韓元吉字無咎開封人維之子仕至吏部尚書龍圖閣學士封穎川公嘗師尹焯得呂祖謙為壻師友淵源為諸儒所推重徙居上饒所居之前有澗水號南澗澗南有園築亭竹間號蒼筤與兄元隆俱登甲第卒葬城東所著有愚懋錄周易繫辭等書子琥字仲止號澗泉與趙奉泉同時有詩名稱二泉先生方虛谷詩上饒有二泉指此通志晁謙之字恭祖舊志作恭道澶州人渡江親族離散極力收卹

因居信州仕宋官敷文閣直學士卒葬鉛山鵞湖子孫因

家焉明志

周聿字德元青州人徙居上饒紹興間召對陳經綸匡濟策稱旨累官刑戶部侍郎所著有春秋大義易說等書子舜元字濟美嘗為州牧省郎皆可紀述親喪杜門謝客蔬食三年明志郡前志

趙不迂字畱臣嘗劄書樓於上饒吟咏自適兄不遷字茂

嘉後改名不過登進士第為清湘令嘗立兼濟倉于鉛山

天王寺通志

上饒縣志

卷十

人物 寓賢

七

尹穡字少稷兗州人博學能文登孝宗朝進士累官殿中侍御史後遷至右諫議大夫紹興間僑居懷玉山以方名齋徙上饒溪南之太霞宮開軒種竹曾文清以友直名之

通志

王洋字元渤東牟人仕至起居舍人僑居城之南池賦詩自適曾文清和之且嘗爲叢珍集酬唱之盛甲於一時

通志

周墜字仲固仕至湖南轉運判官徙居上饒扁所居曰尙

論東萊呂舍人有詩

通志

王傳字巖起蓬萊人嘗居上饒赴淮東提舉呂東萊有贈

行詩云隨行萬卷書旣足以自娛因知君所樂不在使者車可以見其人矣

通志

朱熹號晦菴愛邑治南巖山水之勝嘗寓其地講學多見題咏又與陸復齋象山呂東萊講道於鷺湖嘗時有障百川廻狂瀾之稱後人思其風建祠於南巖寺左祀之

舊志

陳良祐字天與金華人登紹興進士歷起居中書舍人左司諫言會子之弊願捐內帑以紓細民之急上慨然從其

言累遷吏部尙書後因忤旨貶瑞州居任尋移信州

宋史宏簡

錄增

柳勅字公渙其先河東人徙居信州登元符進士任河南  
叅軍時徽宗惑於靈素誅求百姓勅上疏不報嘆曰主上  
崇虛棄實吾旣不能正君可負所學而羈縻爵祿乎竟解  
組南旋道經湖口訪陶元亮故址遂卜居焉

通志增

國朝

陳璋字青璉號琢菴陝西鬱林人善琴工詩自號三痴老  
人不投時好惟耽山水歲丁巳叅戎劉景榮過於采石挈  
之俱來在署數年罕所接見及病旬餘忽坐起  
絕而逝時年七十二葬景德寺側人呼爲仙人

